



## DAMASK: Uhapšeni pred odlazak u Siriju

Policijski službenici **SIPA** jučer su, u nastavku akcije Damask, uhapsili tri osobe i pretresli objekte na tri lokacije u Velikoj Kladuši. Kako je saopšteno iz **SIPA**, ove aktivnosti realizovane su po naredbama Suda i Tužilaštva BiH, a u saradnji s MUP-om USK-a. Uhapšeni su N. Š. (1988), A. M. (1960) i Dž. V. (1989) zbog sumnje da su počinili krivično djelo protivzakonito formiranje i pridruživanje stranim paravojnim ili parapolicijskim formacijama.



Tokom pretresa pronađeno je i privremeno oduzeto šest ručnih bombi, trenutna tromblonska mina, dvije protivpješadijske nagazne mine, 26 komada municije za puškomitraljez M-84 7,62 mm, 30 komada puščane municije 7,9 mm, šest komada pištoljske municije 7,65 mm, mačeta, zastava ISIL-a, plastični šablon za oslikavanje obilježja ISIL-a, mobiteli, SIM kartice i drugi predmeti koji mogu poslužiti kao dokaz u daljem postupku.

- Osobe lišene slobode privedene su u prostorije **SIPA**, gdje će biti kriminalistički obrađene, nakon čega će se, shodno uputama postupajućeg tužioca, odlučiti o njihovom daljem statusu, saopćeno je iz **SIPA**.

Iz Agencije su kazali i kako su njeni službenici u subotu, u nastavku iste akcije, na graničnom prelazu Hum - Ščepan-Polje uhapsili dvije osobe. Nakon privođenja i kriminalističke obrade, S. K. je u nedjelju, uz izvještaj o počinjenom krivičnom djelu i počiniocima, predat Tužilaštvu BiH na dalje postupanje, dok je A. J. pušten.

Iz Tužilaštva je saopšteno da je u saradnji s partnerskim institucijama Turske i Crne Gore, na području Turske uhapšen državljanin BiH u pokušaju da ode u Siriju i pridruži se strukturama tzv. ISIL-a. Tužitelj Tužiteljstva BiH je saslušao osumnjičenog, te će naknadno donijeti odluku o daljim aktivnostima. Pri pokušaju odlaska u Siriju u Turskoj je uhapšen Senad Koštac, rođen 20. novembra 1993. iz Velike Kladuše: - Navedeni je lišen slobode nakon što je osmislio plan i prikupio sredstva te se zaputio u pravcu Sirije, kako bi se prikuljučio strukturama tzv. ISIL-a. Prema dokazima, osumnjičeni je iz BiH oputovao u Podgoricu, te nakon toga avionom u pravcu Turske, gdje je uhapšen, navodi se u saopštenju. **E. B.**